

COLUMNA

Las notgs lungas u: Il return en la Madra Gronda

GISULA TSCHARNER

Las dudesch notgs enturn Nadal èn lungas, pelvair, las pli lungas da l'onn. Per mai èn ellas in grond regal, ma pussibilitond da ma retrair in pau en la tauna, en la tauna da notg. Quella è stgira e pergira nossas olmas, noss sentiments zuppads sco in tarpet buntadaivel.

Glischs e chandailas e traglischur da tuttas sorts avain nus bain avunda en quest temp avant e suenter Nadal. Ma pertge ston ins adina dustar il stgir cun tutta forza? Pertge illumina in nus en mania collectiva tut ils ierts e fatschadas da chasa, nossas relaziuns e situaziuns da vita? Nua resta in pau spazi per il «ruaus e paus» che dominescha noss giavischs en il mintgadi sco era las pregias en baselgia?

Jau hai chattà mes spazi da ruaus, mia tauna, mes tarpet. Durmir ordadora en ils guauds da la Bassa, quai è il pli bel, gist en quest temp da las notgs lungas! Cura ch'jau m'hai zuppada en mes satg da bivac (avant hai jau drizzà la cuvrida da spira launa da nursa en il satg da durmir), guard jau ensi en las tschimas che taschan. En pli ma sent jau zugliada dal paus



enturn mai: nagins mustgins e raischens, ni furmiclas ni filunzas, betg ina glimaja, naginas canerettas da pitschens animals che sa ruschnan insanua atras la feglia giu pe...

L'autra damaun na vegn jau betg ad udir ils prims cloms d'utschels anc da notg. Na, il silenzi profund ma maina plaunsieu envers il di che cumenza be bufatg e tard. Il pli gond regal u misteri è la terra che tegna mes corp. Mes sulets patratgs avant che ma durmentar van tar ella, la terra che protegia en ses intern l'entira vita, fauna e flora, la quala para sco morta l'enviern, nunvisibla, nunudibla.

Mort n'è nagut, tut che dorma profunda-

main en il grond venter da Nossa Mamma Terra – siemiond magari da la primavaira che vegn a vegnir insicura. Sco mintg'embrio dad animals ed umans che sa sviluppa en il silenzi stgir da la madra.

Passentar la notg en la stgiraglia-madra, cun giaschair sin la terra-madra plain vita durmentada dadens, quai na sa lascha betg exprimer tgunsch cun plets, quai stoss Ti empruvar tez/za. Sche Ti vas ina giada per durmir ordadora en ils guauds da Turitg (u en ils guauds d'autras citads), lura salida l'emprim la Terra freida che n'è betg propi freida, sco Tia Mamma, e salida las plantas autas! Era quellas n'èn betg mortas u mez-mortas; cun lur brumbels perfetgs pertgiran ellas la vita davent da sontga Barbara enfin l'emna sontga da l'onn che vegn.

Per ils dis che vanzan dal temp stgir d'enviern Ta giavisch jau buns siemis e buns patratgs alerts. Perquai che Tes siemis e Tes patratgs dad oz vegnan a furmar la realitad da damaun.

Gisula Tscharner è spirituala libra en pensiun, stat a Veulden. Qua u là passenta ella era ina notg sut tschiel avert.